

五代史記纂誤補

上

敢



五代史記纂

誤補

有宋朝請大夫吾家廷珍氏縝所作五代史記纂誤其書久佚今武英殿聚珍版所采集者以晁氏讀書志核之約存原書之十五六則其亡失者爲可惜也今年秋校武英殿本五代史點定之餘不無管見輒錄而次之蓋以昔賢緒論并近時人訂正所及因名之爲五代史記纂誤補其薛氏舊史及新舊唐諸書有及五代時事而語或岐出者別爲考異之書不在此數夫末學膚見敢謂有裨前哲然徵類以稽則疑所叢也緣隙以求則徑所通也飛蟲弋獲庶千慮之一得乎殿本向

有考證係

今上初詞臣所輯附載各卷業已布諸學官無藉贅錄
卽事蹟離合其已具薛史考證及通鑑考異者槩不復
著若夫十國四夷歐史本多不備且有遼史宋史及吾
家志伊氏任臣之十國春秋在茲亦閒爲標舉不欲繩
所本無也又朝請所著新唐書糾繆有字書非是一例
勘核精審然點畫小疵或屬刊本偶譌茲旣經校正亦
略不著第薛氏書名五代史歐陽氏書則名五代史記
今行本止作五代史而纂誤標名亦無記字均係傳刻

之謫云乾隆四十三年冬十月歸安吳蘭庭識

五代史記纂誤補卷第一

歸安 吳 蘭庭

梁本紀

太祖

徐州時溥注云凡稱某州某人者皆其節度

謹按此注舉例未諦如晉高祖紀所稱亳州李鄴普
州安崇阮等高萬興傳之坊州李彥昱不必皆節度
也

十二月徙封吳興郡王

三才集言卷之二
謹按此本薛氏舊史若新舊唐書及通鑑則皆無其
文攷舊書昭宗紀龍紀元年四月朱全忠以沛郡王
進封東平王卽薛史于光啟二年已書改封吳興矣
而文德元年五月乃云改帝鄉里爲沛王里則何也
至是張濬私與汴交

謹按此首見張濬而不著其官非也據注文盛本張
濬上有宰相二字

河東叛將馮霸殺潞州守將李克恭來降

謹按唐家人傳作潞州牙將安居受殺克恭與此異

十一月曹州將郭紹賓殺其刺史郭饒來降

謹按新唐書朱瑱傳云瑱復取曹以郭詞爲刺史通鑑係之光啟三年十月此脫去瑱復取曹一節則前此全忠已取曹州此復言來降語失據矣

冬友裕取濮州

謹按紀前於光啟三年十月言取濮州以後不言復失惟通鑑於光啟三年十一月書朱全忠遣朱珍還濮州而友裕傳于景福元年云是時朱宣在濮州張歸霸傳亦云友裕攻鄆屯濮州則朱宣于斗門再勝

之時當復取濮州而史略之也

十一月保義軍亂殺其節度使王琪推其牙將李璠爲
畱後其將朱簡殺璠來降

謹按朱友謙傳云璠立友謙復以兵攻之璠得逃去
與此異蓋此紀傳俱本薛史而薛史記傳自各異也
四月甲辰天子至自西都

謹按新舊唐書昭宗紀俱作閏四月甲辰此脫閏字
以宣武宣義天平護國天雄武順佑國河陽義武昭義
武寧保義忠義武昭武定泰寧平盧匡國鎮國荆南忠

武二十一軍爲魏國

謹按舊唐書哀帝紀武昭作戎昭通鑑同注云戎昭領金均房此仍薛史之誤

弑濟陰王

謹按此事舊唐書哀帝紀作二月二十一日新紀亦係二月通鑑作二月癸卯癸卯正二月二十一日也此則上係正月與新紀如出二手恐誤

戊寅封鴻臚卿李崧介國公爲二王後

謹按薛史崧作從又五代會要梁開平二年三月以

唐宗子李從封萊國公爲二王後其年十二月禮儀
使奏唐朝以魏元氏子孫封韓國公爲三恪周宇文
氏子孫封介國公隋楊氏子孫封鄫國公爲二王後
今國家封唐李氏宗子李從爲萊國公請以介國公
爲三恪鄫國公萊國公爲二王後從之今此下十二
月明有以介國公爲三恪鄫國公萊國公爲二王後
之文知此崧字介字竝誤

癸巳卜郊

謹按監本卜上有改字

翰林學士承旨禮部侍郎張策爲刑部侍郎同中書門下平章事

謹按唐六臣傳策以工部侍郎奉旨拜刑部侍郎不言自禮部爲刑部也攷容齋四筆云舊制執政轉官六侍郎則升兩曹以工禮刑戶兵吏爲敘宰相爲侍郎者升三曹爲尙書者雙轉如工侍轉戶侍禮侍轉兵侍竊意宋制故有所本而微不同此張策當以工侍轉刑侍爲升兩曹也又梁改承旨爲奉旨故策與杜曉傳俱作奉旨而紀俱仍作承旨亦是紀誤

三年春正月甲戌如西都

謹按世多以梁爲都汴州其實不然考通鑑於開平二年云是歲帝將遷都洛陽語蓋本薛史薛史云三年正月己巳遷太廟神主赴西京甲戌發東都已卯入西都是梁此時實自東都遷於西都而此僅以如西都爲文非也然不特此也薛史開平元年十月帝以用軍未暇西幸文武百官久居東京漸及疑訝令宰臣張文蔚已下竝先於西京祇候云云又乾化元年二月壬戌詔曰東京舊邦久不巡幸宜以今月九

日幸東都云云似是梁因乎唐本以洛陽爲都特以
襲位伊始未遽議遷且制置東方利於便近故於受
命之邦竝建東都而郊禋大禮仍就西都行事厥後
均王定亂袁象先遣趙巖齋傳國寶至東都請王卽
位於洛陽而王報之曰大梁國家創業之地何必洛
陽

語見通鑑

可知洛陽自爲上都而東都則止是唐東都

之比故晉張昭遠所奏亦僅云汴州在朱氏稱制之

年有京都之號

見薛史晉高祖紀

則知此下乾化二年所書

四月己巳至自魏州戊寅如西都其內開封而外洛

陽者語亦不合也

夏四月丙午知俊克延鄜坊三州

謹按紀前於天復二年云鄜坊李周彝降以後不言
鄜坊復附於岐攷新唐書昭宣帝紀於天祐三年書
九月乙亥匡國軍節度使劉知俊陷坊州十月辛巳
楊崇本會鳳翔涇原鄜延秦隴兵以討朱全忠蓋鄜
坊之地岐汴得失不常而史亦不備著也

秋七月甲申襄州軍亂殺其畱後王班

謹按劉玘傳作山南節度使王班